

Broj: 02-45-503/23

Datum 27.07.2023. godine

Na osnovu člana 13. Zakona o principima lokalne samouprave u Federaciji BiH ("Službene novine Federacije BiH", broj 49/06 i 51/09), člana 171. Zakona o socijalnoj zaštiti, zaštiti civilnih žrtava rata i zaštiti porodice sa djecom ("Službene novine Kantona Sarajevo", broj 3/14 – prečišćeni tekst, 38/16, 44/17, 28/18, 52/21 i 40/22) i člana 25. Statuta Općine Stari Grad Sarajevo – prečišćeni tekst ("Službene novine Kantona Sarajevo" broj 20/13), Općinsko vijeće Stari Grad Sarajevo, na sjednici održanoj dana 27.07.2023. godine, donijelo je

PRAVILNIK o dodjeli jednokratne novčane naknade porodiljama

Član 1.

Ovim Pravilnikom utvrđuju se uslovi, visina naknade i način ostvarivanja prava na dodjelu jednokratne novčane naknade za porodilje sa područja Općine Stari Grad Sarajevo.

Član 2.

Pravo na dodjelu jednokratne novčane naknade iz člana 1. ovog Pravilnika ostvaruju porodilje pod uslovima:

- 1) da je dijete nakon rođenja prijavljeno na području Općine Stari Grad Sarajevo;
- 2) da je jedan od roditelja državljanin Bosne i Hercegovine;
- 3) da porodilja ima:
 - prijavljeno prebivalište na području Općine Stari Grad Sarajevo u trajanju od najmanje 1 (jedne) godine dana u kontinuitetu do dana rođenja djeteta,
 - boravište na području Općine Stari Grad Sarajevo u trajanju od najmanje 1 (jednu) godinu dana do dana rođenja djeteta, a ima priznat status raseljenog lica;
- 4) ukoliko porodilja ne ispunjava uslove iz tačke 3) ovog člana, da otac djeteta ima prijavljeno prebivalište na području Općine Stari Grad Sarajevo u trajanju od najmanje 1 (jedne) godine prije rođenja djeteta;
- 5) da, ako jedan od roditelja djeteta ima prijavljeno prebivalište na području druge općine u BiH, nije ostvario jednokratnu novčanu naknadu za rođenje djeteta u Općini u kojoj ima prijavljeno prebivalište.

Član 3.

- (1) Pravo na dodjelu jednokratne novčane naknade, porodilja može ostvariti uz ispunjavanje uslova iz člana 2. ovog Pravilnika i to:

- 1) za prvo i drugo novorođeno dijete u iznosu od 500,00 KM,
 - 2) za treće i svako naredno novorođeno dijete u iznosu od 750,00 KM,
 - 3) za novorođene blizance, bez obzira na broj djece u porodici, u iznosu od 1.500,00 KM.
- (2) Porodilji koja rodi mrtvo dijete ili dijete umre u roku od 60 (šezdeset) dana od dana rođenja, pripada pravo na jednokratnu novčanu naknadu u iznosu od 1.000,00 KM.

Član 4.

- (1) Porodilja ili otac djeteta iz člana 2. ovog Pravilnika podnosi zahtjev za ostvarivanje prava na dodjelu jednokratne novčane naknade u roku od 60 (šezdeset) dana od dana rođenja djeteta.
- (2) Zahtjev se podnosi nadležnoj službi za obavljanje poslova iz socijalne zaštite.

Član 5.

Uz zahtjev za ostvarivanje prava iz člana 1. ovog Pravilnika potrebno je priložiti sljedeću dokumentaciju:

- 1) Izvod iz matične knjige rođenih za novorođeno dijete/djecu;
- 2) Potvrdu o prijavi prebivališta za novorođeno dijete/djecu;
- 3) Izvod iz matične knjige rođenih za svu ostalu djecu ukoliko se zahtjev podnosi za ostvarivanje prava za treće i naredno dijete;
- 4) Uvjerenje o kretanju za roditelje djeteta/djece;
- 5) Izjava o zajedničkom domaćinstvu;
- 6) Potvrda da drugi roditelj nije ostvario jednokratnu novčanu naknadu za rođenje djeteta/djece u drugoj općini na području BiH (u slučaju da drugi roditelj ima prijavljeno prebivalište na području druge općine);
- 7) Izvod iz matične knjige državljana za roditelje djeteta/djece;
- 8) Potvrda banke o broju računa za podnosioca zahtjeva na koji će se doznačiti sredstva na ime naknade.

Član 6.

Nadležna služba izvršit će uvid u dostavljenu dokumentaciju, te ukoliko su ispunjeni uslovi za ostvarivanje prava na jednokratnu novčanu naknadu porodiljama, utvrđeni ovim Pravilnikom, sačinjit će Odluku i istu dostaviti Općinskom načelniku na potpis.

Član 7.

Nadležna Služba dužna je pratiti ostvarivanje prava na dodjelu jednokratne novčane naknade porodiljama, na propisan način voditi evidenciju o ostvarivanju navedenog prava, te pratiti utrošak sredstava iz Budžeta Općine za ovu namjenu.

Član 8.

U Budžetu Općine Stari Grad Sarajevo za svaku kalendarsku godinu planiraju se sredstva za dodjelu novčane naknade porodiljama.

Član 9.

Stupanjem na snagu ovog Pravilnika, prestaje da važi Pravilnik o visini i načinu isplate jednokratne novčane pomoći porodicama („Službene novine Kantona Sarajevo“, broj 25/16)

Član 10.

Postupci koji su započeti prije stupanja na snagu ovog Pravilnika, okončat će se po proceduri propisanoj ovim Pravilnikom.

Član 11.

Ovaj Pravilnik stupa na snagu 8 (osmog) dana od dana objavljivanja u "Službenim novinama Kantona Sarajevo".

**PREDSJEDAVAJUĆI OPĆINSKOG VIJEĆA
STARI GRAD SARAJEVO**

Seid Škaljić

